

太上虛皇天尊四十九章經

卷上

立功章第一

天尊曰凡欲修道建功為先是以諸天上帝諸天高尊諸天真人諸天神仙咸以功勤超聖真位諸天記功而為品格積功滿千形神俱仙功不及千形滅神仙功及兆民玉清之寶凡說為仙化為真人無礙洞合自然消則為氣息則為人神通自在變化無形飛行三界出幽入明吾昔在世立世之功吾遊天中諸天奏功一切眾生咸願濟拔心不退轉自得真道

齋戒章第二

天尊曰齋戒者道之根本法之津梁子欲學道清齋戒念正真邪妄自泯一切眾生捨清淨域耽嗜膏膾而以觸法譬如餓鬼啗食死屍大燒飢腸無有飽滿又如蠅蟲爭奪臭腐妄為糞香而以觸法三宮溷濁六腑不淨屍魄欣昌樂於死地子當割嗜慾根入清靜境無作諸苦無造諸惡無生諸見無起諸邪子觀戒文如世法律欲有所犯懼金木刑

子於戒文精意奉持凜然在前如對所畏衷心正嚴滅一切想諦聽不二可會正真是吾弟子

識本來章第三

天尊曰虛無自然道所從出真一不二體性湛然圓明自足不墮諸見遠離塵垢學無所學修無所修於中了然不去不住不取不捨無樂無惱無死無生無古無今是真解悟觀諸形相等皆虛空滅除世幻體合自然

善應章第四

天尊曰人有一善百神俱奉人有十善司命備算人有百善東華注名人有千善福及七祖死魂為仙萬善既備玉符下迎千神來朝白日登宸

法力能揮章第五

天尊曰子知悲人不能悲身地水火風假合四大延土為器託炬火中而得堅固子身猶器法猶炬火能揮子身成不壞質

積善為寶章第六

天尊謂妙行真人曰子登寶山周行左右萬

寶縱橫無不可愛當下山際能勿持手妙行真人曰不持以歸是謂自棄天尊曰善哉人生於世如在寶山種種善緣皆為寶也子不造善當來離世是猶登彼寶山空手而歸不持一物後無悔事

除垢章第七

天尊曰子形不淨受諸染著積垢於身必思滌滌心垢不淨六根所染弗思其滌茲為迷惑是故身垢不淨以世水洗之心垢不淨以法語洗之六根清淨表裏洞明無毫髮染方造無為

味道章第八

天尊曰子之食蜜橘口皆甜舌有餘味味吾之言有甚於是

斷因緣章第九

天尊曰一切眾生從因生因從緣生緣以因緣故結諸煩惱成無量業墮於生滅輪轉不窮如浪中漚幾成幾壞爾須了悟本來皆空自生諸見自著一切種種眷屬是煩惱根與牢獄等此心不悟知大罪人無始以來身被

繫縛無有解脫吾今為汝滅前後因斷一切緣識因非因識緣非緣不因不緣湛然常定無去無來無雜無著一切解脫超出三界

自新章第十

天尊曰一切男女於三寶前稽首歸命洗滌垢穢令心地淨悔過自新誓勿復造可以為吾弟子其有男女處世以來於三寶前內省於中無可懺悔是吾真弟子

布施章第十一

天尊曰有餘而施非難不足施之為難施所不欲非難施所甚愛為難一切諸福皆自歡喜中來一切布施歡喜心一切財寶眾生性命或施以物歸獻三寶或施以法覺悟一切種種善果福報無邊

勤行章第十二

天尊曰知吾道者復不能行吾道者復不能入難至於道知而能動久而不忘如渡滄海日求著岸終始若一道為子得

鍊織成真章第十三

天尊語妙行真人曰子未生時混混沌沌本

無一物視聽不得與真常會無有名相執為妙行吾今為汝究未生理種種形相俱為幻假春此幻身與我為累譬如鑄劍鍛鍊滓穢始見精鋼勇烈無滯當成妙器

演化章第十四

天尊謂妙行真人曰從吾道者是名善業離吾道者是名惡業太上立德其次立功其次立言成有等差同歸于道一切眾生顛倒妄想造地獄行不自覺知踊躍相進投於愛河汝為眾生敷演教法方便說而為接引當得福報同證無為

真成章第十五

妙行真人問天尊曰何者名為真人復修何道獲證此果天尊曰精心苦行絕世所欲不與妄想無有染著鍊形化炁鍊炁化神鍊神合道體入自然斂萬法歸於一身以一身而化萬境不滯有無永絕生滅是名真人

三乘等差章第十六

天尊曰末學之士目不安視耳不安聽心不安知禁約一切泯絕萬態以致於道至學之

士視無所見聽無所聞心無所知動無所迷以觀眾妙大乘之士無見而無不見無聞而無不聞無知而無不知內外洞然達彼無間故能參宇宙而遊無盡之域

以言勸善章第十七

天尊曰贈人以財不若贈人善言黃金雖貴用之則窮善言於心終身為寶一切神仙真人皆以無上要言得成道果子能持是說普告眾生令得奉行獲福無量

苦樂先後章第十八

天尊曰學道之士斷諸愛慾却絕肥鮮長齋清思研味至道是為苦中求樂能知其樂不見其苦一切眾生貪戀榮華迷惑聲色肆情縱慾造諸快樂者是造諸苦吾道苦而後樂眾生樂而後吾吾今告子當明慎之

不二門章第十九

天尊曰吾道無親疎吾眼無貴賤一切眾生皆以等觀有善性者與成其善有道德者與證其道若有所擇是有二門

不殺章第二十

天尊曰子欲學吾道慎勿懷殺想一切諸衆生貪生悉懼死我命即他命慎勿輕於彼口腹樂甘肥殺戮充啖食能懷惻隱心想念彼驚怖故當不忍啖以證慈悲行

清淨章第二十一

天尊曰學道之士以清淨為本長齋眇思肅詠太無觀諸邪道如親仇僻遠諸愛慾如避臭穢除苦惱根斷親愛緣冥冥濁海自得淨界如白蓮花生淤泥中亭亭出水不受汚染五臟清爽三田華素太玄真人自與子鄰

不妄章第二十二

天尊告妙行真人曰大乘法可出三界如不行吾道即是以我為妄吾以不妄故得證此故信者心之實一切真人皆以信心得成道果

慈悲章第二十三

天尊曰汝等衆生以慈悲為本觀一切物常行不忍世人痛苦如在我身當願救護普令安樂一切衆生以惡癡故陷諸罪苦爾不救拔等是惡癡常行大悲心自成無上道

萬法歸一章第二十四

天尊曰萬派枝流同歸于海萬法紛紜同歸于道衆生執著自生分別富有圓通無闕一貫諸義

斷穢濁章第二十五

天尊曰一切衆生皆自穢濁中來復以穢濁而往有能清淨信吾戒言不受染著斷除雜想即得出離濁浪入我法門無去無來永超塵劫

洗心章第二十六

天尊曰六根不淨當洗其心心不受垢自無諸穢故心為宰官統御一切降伏其心猶馭猛虎如有縱恣反傷汝身

證真章第二十七

天尊曰學道之士清虛而容非極危而濟難慈向萬物滅毒惡想觀一切衆生如我眷屬有飢寒者念與水食有疾病者念與醫藥有冤讎者念與解釋如是慈悲心種種不可量當來及後世證彼真人行

財為患本章第二十八

天尊曰財為患之本聚財為聚業財為愛慾根能起一切罪若以財非財始可入道境

至言普潤章第二十九

天尊曰一切衆生牽於情愛如蹈猛火靡得休息從少至老不自知覺吾言如甘露能灑一切使其心地自得清涼

忍辱章第三十

天尊曰忍著身之寶慎勿與人爭一切諸魔來吾以忍坐勝不與羣魔競來者自反戈損人還自損我實得安靖一切諸真人皆以忍辱故

造福田章第三十一

天尊曰人生一世間譬如電光速嬰兒化老耄倏忽春夢中勇猛進於善自己悲不及處世無福田瞑目何所恃

正念章第三十二

天尊曰子心無邪念一念徹虛空一切虛空中皆有聖與賢常作平等觀勤修無上行自見虛無老久入大乘

出有無章第三十三

天尊曰眾生迷惑妄見諸有吾道本無有諸
眾生顛倒妄見諸無吾道亦無非有非無即
有即無作是解者能超一切

施言無罪章第三十四

妙行真人問天尊曰何者布施功德最重天
尊曰以吾言施人功德最重妙行真人曰處
世何物為寶天尊曰無罪於身是為至寶

隨緣受報章第三十五

妙行真人問天尊曰宿命因緣可以知否天
尊曰汝思見世因緣則知宿命因緣汝修見
世因緣則知來世因緣一悉無偏阿所種還
自生植此荆棘根何由望森林

大力章第三十六

妙行真人問天尊曰世間何力為大天尊曰
慈悲之力最為廣大慈悲之心能化一切惡
惡之行能伏一切惡者無與爭強者無與抗
所向無敵是為其力廣大無邊

契道章第三十七

天尊謂妙行真人曰子欲學吾道口無是非
言心無人我相身不染著方契無為道眾

生俱幻化墮彼色相固雖知樂是苦一念了
無為

心起憂樂章第三十八

天尊曰子勿包禍心損害於一切眾生初未
覺神明悉已知危人還自危枉彼還自枉天
堂及地獄一切由心造

道法章第三十九

天尊曰吾道猶炬火取之無窮隨其所與能
飪熟一切吾法等泉源能灌溉枯槁潤澤一
切子身障惱自與道違

入妙章第四十

天尊曰入我法門者學至於無所學行至於
無所行了至於無所了是謂入眾妙門洞觀
無礙眾生執著妄究終始自謂造於最勝是
猶妄見諸色

去華章第四十一

天尊曰清淨者道之本榮華者道之殃子勿
憎淡泊是有至味愚癡戀世欲類蟻投火
先不知其為害以至於滅亡

同好惡章第四十二

天尊曰子慎無綺妄誑惑諸眾生勿懷喜惡
心陰謀諸一切以身譬他人好惡元無異能
作是念者可證無上道

先實後施章第四十三

妙行真人問天尊曰頗謂聖王以能利益一
切救拔眾生無有厭倦念念相因故能成真
若復有人能作是念當知果報無差天尊曰
汝勿輕用勤修其行使中實有見道之源自
然流施無盡

超色相章第四十四

妙行真人曰聖王妙相七十二項負九色光
諸天仙人以是觀天尊也靡不讚善恭敬禮
拜無上希有天尊曰我以非色汝妄為色我
以非相汝妄為相一切初地以肉眼故不能
洞觀若以九色七十二相觀我即是離無著
有不可與聞無上之義

一切持道章第四十五

妙行真人問曰一切有目可見諸色至於微
妙之法不可得見天尊曰吾道猶日光明普
照種種色相人始能別廢日之光有目絕視

子慎為道無復中輟

勇決學道章第四十六

天尊曰學道之士慎無二心斷絕塵染割棄愛緣心如寒灰滅除猛餒苦身勵行禍難不顧如夫一發往而不回吾保子身必得道真

魔誠章第四十七

天尊曰學道甚難鬼神魔王敗人成功但欲其死不喜仙道子將道成復有諸天仙人來試爾身仙人之來試也或試以所欲或試以所不欲或試以所難或試以所畏皆於心之所不悟意之所不造也試之過者諸天保舉魔王奉迎是謂得道

易心向道章第四十八

天尊曰上士貪善下士貪財一切眾生書不能息夜不能寐唯慮貨財不足於身子易其心而學道安有不得矣

勉行章第四十九

妙行真人問曰學道甚苦如負重登山可厭而止天尊曰子勉於前既登絕頂其苦亦息俯視一切皆微眇也

太上虛皇天尊四十九卷經

正一天師清微弟子 洪百堅 製作
道教學術資訊網站

三經同卷

第十三

太上昇玄消災護命妙經

三元注齋齋福延壽妙經

太上長生延壽集福德經

太上昇玄消災護命妙經

爾時

元始天尊在七寶林中五明宮內與無極聖眾俱放無極光明照無極世界觀無極眾生受無極苦惱宛轉世間輪迴生死漂浪愛河流吹欲海沈滯聲色迷惑有無無空有空無色有色無無有無有有無有終始暗昧不能自明畢竟迷感
天尊告曰汝等眾生從不有中不無中無不色中色不空中空非有為有非無為無非色為色非空為空空即是空空無定空色即是色色無定色即是空即是色若能知空不空知色不色名為照了始達妙音識無空法洞觀無礙入眾妙門自然解悟離諸疑網不著空見清靜六根斷除邪障我即為汝